

漢高入關告諭文景兩代詔書深切著明膾炙人口
我

朝

聖相承綸綍頒行敷陳事理成大文焉蓋睿智聰明
胥由天縱故出口成章可傳可誦二典三謨不能專
美矣懿歟盛哉至文人學士揆藻摘華凡闕邑事者
皆收錄焉備一邦文獻也

宸章

御製至聖先師孔子贊并序
康熙三十三年頒行

蓋自三才建而天地不居其功一中傳而聖人代宣
其蘊有行道之聖得位以綏猷有明道之聖立言以
垂憲此正學所以常明人心所以不泯也粵稽往緒
仰溯前徽堯舜禹湯文武達而在上兼君師之寄行
道之聖人也孔子不得位窮而在下秉刪述之權明
道之聖人也行道者勲業炳於一朝明道者教思周
於百世堯舜文武之後不有孔子則學術紛淆仁義
湮塞斯道之失傳也久矣後之人欲探二帝三王之
心法以爲治國平天下之準其奚所取衷焉然則孔

子之爲萬古一人也審矣朕巡省東國謁祀闕里景
企滋深敬摛筆而爲之

贊曰

清濁有氣剛柔有質聖人參之人極以立行著習察
舍道莫由惟皇建極惟后綏猷作君作師垂統萬古
曰惟堯舜禹湯文武五百餘歲至聖挺生聲金振玉
集厥大成序書刪詩定禮正樂旣窮象繫亦嚴筆削
上紹往緒下示來型道不終晦秩然大經百家紛紜
殊途異趣日月無踰羹牆可晤孔子之道惟中與庸

此心此理千聖所同孔子之德仁義中正秉彝之好
根本天性庶幾夙夜勗哉令圖溯源洙泗景躅唐虞
載厯庭除式觀禮器摘毫仰贊心焉遐企百世而上
以聖爲歸百世而下以聖爲師非師夫子惟師於道
統天御世惟道爲寶泰山巖巖東海泱泱牆高萬仞
夫子之堂孰窺其藩孰窺其徑道不遠人克念作聖
子思子贊

於穆天命道之大原靜養動察庸德庸言以育萬物
以贊乾坤九經三重大法是存篤恭愼獨成德之門

卷之藏密擴之無垠

顏子贊

聖道早聞天資獨粹約禮博文不遷不貳一善服膺
萬德來萃能化而齊其樂一致禮樂四代治法兼備
用行舍藏王佐之器

曾子贊

洙泗之傳魯以得之一貫曰唯聖學在茲明德新民
止善爲期格致誠正均平以推至德要道百行所基
纂承統緒修明訓辭

孟子贊

哲人既萎楊墨昌熾子輿闢之曰仁曰義性善獨聞
知言養氣道稱堯舜學屏功利煌煌七篇並兼六藝
孔學攸傳禹功作配

聖祖仁皇帝御製平定朔漠告成太學碑

維天盡所覆海內外日月所出入之區悉以畀予一人自踐祚迄今早夜殫思休養生息冀增熙皞以克副維皇大德好生之意庶幾疆域無事得以偃兵息民廼厄魯特噶爾丹險阻北郵因此一方人旣荼毒塞外輒狡焉肆其凶逆犯我邊鄙虐我臣服人用弗甯夫蕩寇所以息民攘外所以安內邊寇不除則吾民不安此神人所共憤天討所必加豈憚一人之勞弗貽萬人之逸於是斷自朕心躬臨朔漠欲使悔而

革心故每許以不殺彼怙終不悛我師三出絕塞朕
皆親御以行深入不毛屢涉寒暑勞苦艱難與偏裨
士卒共之迨彼狂授首脅從歸誠荒外君長來享闕
下西北萬里灌燧銷烽中外乂謐惟朕不得已用兵
以安民既告厥成事乃蠲釋青災潔事禋望爲億兆
祈昇平之福而廷臣請紀功太學垂示來茲朕勞心
於邦本常欲以文德化成天下顧茲武畧廷臣僉謂
所以建威銷萌宣昭斯績於有永也朕不復辭考之
禮王制有曰天子將出征受成於學出征執有罪反

釋奠於學以飢飫告而泮宮之詩亦曰矯矯虎臣在
泮獻馘又禮王師大獻則奏凱樂大司樂掌其事則
是古者文事武事爲一折衝之用具在樽俎之間故
受成獻馘一歸於學此文武之盛制也朕嚮意於三
代故斯舉也出則告於神祇歸而遣祀闕里茲允廷
臣之請猶禮先師以告克之遺意而於六經之旨爲
相符合也爰取思樂泮水之義爲詩以銘之以見取
亂侮亡之師在朕有不得已而用之之實或者不戾
於古帝王伐罪安民之意云爾銘曰

巍巍先聖萬世之師敬信愛人治平所基煌煌聖言
文武道一禮樂征伐自天子出朕臨域中逾茲三紀
嘗見羹牆寤寐永矢下念民瘼上承帝謂四海無外
盡隸侯尉維彼凶醜瀆亂典常旣梗聲教遂窺我疆
譬之於農患在螟螣秉畀不施將害稼穡度彼游魂
險遠是怙震以德威可往而取朕志先定龜筮其依
屬車萬乘建以龍旂祝融騶鸞風伯戒途宜雨宜暘
利用樵蘇大野水涸川瀆効靈泉忽自湧其甘如醴
設爲犄角一出其西一出其東中自將之絕域無人

獸羣受掩五日窮追彼狂走險大殲於路波血其孥
翦其黨孽俘彼卒徒衆鳥書號單馬宵遁恐久駐師
重爲民困慎固戍守遷轅於今自夏往冬雨雪其零
載馳載驅我行至再蠢茲窮寇昏惑不悔我邊我氓
以休以助爰甯其居爰復其賦藩落老稚斯恬斯嬉
歲宴來歸春與之期春風飄颻揚我旆旂我今於邁
如涉我郊言秣我馬狼居胥山登高以眺閔彼彈丸
天降凶罰孤雛就羈三駕三捷封狼輿尸旣腊梟獍
旣獮豺豕大漠西北解甲棄戈振旅凱入澤沛郊卜

明禋肆赦用迓景福昔我往矣在泮飲酒陳師鞠旅
誓屈羣醜今我來思在泮獻功有赫頌聲文軌來同
采芹采藻頌聲東魯車攻馬同亦鐫石鼓師在安民
非出得已古人有作昭示此旨緬維虞廷誕敷文德
聖如先師戰勝必克惟兵宜戢惟德乃綏億萬斯年
視此銘詞

御製訓飭士子文

康熙四十一年頒行直省學官勒石

國家建立學校原以興行教化作育人才典至渥也
朕臨馭以來隆重師儒加意庠序近復慎簡學使釐
剔弊端務期風教修明賢才蔚起庶幾棧樸作人之
意乃比來士習未端學效罕著雖因內外臣工奉行
未能盡善亦由爾諸生積錮已久猝難改易之故也
茲特親製訓言再加警飭爾諸生其敬聽之從來學
者先立品行次及文學學術事功源委有敘爾諸生
幼聞庭訓長列宮牆朝夕誦讀甯無講究必也躬修

實踐砥礪廉隅敦孝順以事親秉忠貞以立志窮經
考義勿雜荒誕之談取友親師悉化驕盈之氣文章
歸於醇雅毋事浮華軌度式於規繩最防蕩軼子衿
佻達自昔所譏苟行止有虧雖讀書何益若夫宅心
弗淑行己多愆或蜚語流言脅制官長或隱糧包訟
出入公門或唆撥姦滑欺孤凌弱或招呼朋類結社
要盟乃如之人名教不容鄉黨弗齒縱倖脫褫扑濫
竊章縫返之於衷能無愧乎况鄉會科名乃掄才大典
關係尤鉅士子果有真才實學何患困不逢年顧乃

標榜虛名暗通聲氣夤緣詭遇罔顧身家又或改竄
鄉貫希圖進取囂凌騰沸網利營私種種弊端深可
痛恨且夫士子出身之始尤貴以正若茲厥初拜獻
便已作姦犯科則異時敗檢踰閑何所不至又安望
其秉公持正爲國家宣猷樹績膺後先疏附之選哉
朕用嘉惠爾等故不禁反復惓惓茲訓言頒到爾等
共體朕心恪遵明訓一切痛加改省爭自濯磨積行
勤學以圖上進國家三年登造束帛弓旌不特爾身
有榮卽爾祖父亦增光寵矣逢時得志甯俟他求哉

若仍視爲具文玩愒勿儆毀方躍冶暴棄自甘則是爾等冥頑無知終不能奉教也旣負栽培復干咎戾王章具在朕不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業不修咎亦難逭勿謂朕言之不預也爾多士尚敬聽之哉